



Trun cun las baselgias da S. Martin e Nossadonna da la Glisch (a dretga). Vista en direcziun da Sumvitg e Mustér.



Il vitg da Schlans è situà sin la spunda sanestra aut sur il Rain Anteriur.

# Trun – lieu da fundaziun da la Lia Grischa

■ **La vischnanca da Trun, situada en la part inferiura da la Cadi, è segnada istoricamain da sia posiziun sco lieu central da la Lia Grischa. Da questa ierta dattan differents monuments perdita fin il di dad oz.** En il 19avel e 20avel tschientaner èn colliadas cun Trun personalitads marcantas sco pader Placi Spescha (1752–1833), il politicher Caspar Decurtins (1855–1916) u ils artists Alois Carigiet (1902–1985) e Matias Spescha (1925–2008). Dapi il 2012 appartegna er l'antieriura vischnanca politica da Schlans a la vischnanca da Trun.

## Zignau

Fraziun da la vischnanca politica da Trun, tudestg Ringgenberg, cun ils aclauns Lumneins, Darvella Dado e Tiraun. L'aul da Zavràgia furmava en il 9avel tschientaner il cunfin vest da la Cent Tuverasca (Surselva) cun la Cadi. La baselgia deditgada als ss. Giachen e Cristoffel, ina baselgia filiala da Trun, è dapi il 1678 ina chaplania. Zignau è permanentamain periclità dad auas grondas da la Val Zavràgia (tranter auter il 1927 ed il 1987).

Il chastè da Zignau cun tur, mir da tschinta ed edifizis secundars sin ina collina da morena sur Zignau (oz ina ruina), erigì en la segunda mesadad dal 13avel tschientaner, pli tard engrondì, è vegnì bandunà en il 15avel tschientaner. Quest chastè ministerial dals nobels de Ringgenberg vegn designà en las brevs da federaziun dal 1351 e 1352 sco punct da cunfin dal circuit d'agid confederal. La dumonda, schebain ils nobels da Ringgenberg/Zignau eran in rom dals Ringgenbergs domiciliads al Lai da Brienz/BE (vopna correspundenta) n'è betg sclerida.

Adolf Collenberg

## Ringgenberg

La vopna dals Ringgenberg fa allusiun a sia parentella cun ils nobels da Ringgen-

berg residents al Lai da Brienz/BE. Ils Ringgenberg èn probablmain vegnids sur il Vallais en il Grischun, nua ch'els èn attestads dapi il 1283 (Rudolf). Il 1325 èn stads ils frars Johann garants per l'abazia da Mustér, ed il 1424 ha sigillà Christoffel la brev da la Lia Grischa per ils da Schons. Enturn il 1450 figurescha Rudolf sco curatur da la citad da Cuir e chau da la Lia da la Chadé. Il 1357 cumpara Wetzell Pascell a Ringgenberg/Zignau sco ministerial da la claustra da Mustér, ed il 1494 han vendì ils uffants da Stoffel von Ringgenberg in tschains sin in feud ereditar «ab dem hof zu Ringgenberg». Il chastè da Ringgenberg/Zignau è vegnì bandunà apparentamain en il 15avel tschientaner.

## Grepault

Restanzas d'ina fortezza cun baselgia dal temp medieval tempriv, situada en la vischnanca da Trun sin in'imposanta collina grippusa a la riva dretga dal Rain Anteriur tranter Trun e Zignau. Perscrutaziuns archeologicas han purtà a la glisch numerus abitadis preistorics dal temp da bronz e dal temp da fier tardiv. Dal temp medieval tempriv dateschan restanzas d'in mir da tschinta. La baselgia dal temp medieval tempriv, situada al nordost dal complex, n'è betg colliada cun in abitadi. Perditegas en scrit mancan. La fortezza è probablmain vegnida bandunada gia en il 8avel u 9avel tschientaner.

Maria-Letizia Boscardin

## Farberg

Ruina da chastè en il territori da la vischnanca da Trun, situada sin ina morena a la via tranter Trun e Schlans. Mantegnidas èn la cisterna e parts dal fundament. 1252 castrum Fridelberg, 17avel tschientaner Fridberg, Frickberg, tudestg Friberg. Il num po esser ina furma populara da Fryberg. Sedia dals chastellans da la claustra da Mustér. Il 1249 ha l'admi-

nistraziun claustrala vendì il chastè illegalmain, ed en il 14avel tschientaner è Farberg passà, puspè illegalmain, en possess dals Werdenbergs ch'han restitui quel il 1327 a la claustra, ensemen cun la curt a Breil. Il chastè è vegnì bandunà en il 15avel tschientaner.

## Schlans

Antieriura vischnanca politica, circul Mustér, district Surselva (avant il 2001 Rain Anteriur), situada sin la spunda sanestra aut sur il Rain Anteriur; fusiunada il 2012 cun la vischnanca politica da Trun. 765 *Selaunum* (copia). 1656 180 abitants; 1836 112; 1850 169; 1900 174; 1950 192; 2000 92. L'on 765 ha regalà l'uvestg Tello a la claustra da Mustér ina migiuria e colons a Schlans che n'ha dentant betg fatg part da la Cadi en il temp medieval, mabain dal domini dals signurs locals de Slauns (attestads il 1220). La tur da defensiun a Schlans ed il chastè da Salons sur Schlans èn vegnids erigids enturn il 1200. Il domini è alura passà als Grünenfels, als Montalts ed il 1378, tras cumpra, ad Ulrich Brun de Razén per vegnir integrà finalmain al signuradi da Munt S. Gieri. Il 1459 è el passà als conts de Zollern ed il 1472, tras cumpra, a l'abazia da Mustér ch'ha possedi la giurisdicziun fin il 1798 respectivamain 1803. Il 1734 è la vischnanca da Schlans vegnida attribuida a la nova dretgira da Rueun. Dapi il 1851 ha ella fatg part, sco settavla vischnanca, dal circul da Mustér. Ecclesiasticamain ha Schlans appartegnì oriundamain a Breil. L'on 998 è attestada la baselgia da S. Gieri, incorporada il 1185 a l'abazia da Mustér. Il 1518 è ella daventada ina curazia, il 1643 ina baselgia parochiala. La vischnanca da Schlans ha stuì far grondas investiziuns per rempars cunter lavinas e bovas, oravant tut suenter la catastrofa dal november 2002. Il 2010 possedeava Schlans anc quatter manaschis purils.

Part da la populaziun da lingua rumantscha: 2000 81,5% / 92,4% (megra lingua / tuttas indicaziuns). Adolf Collenberg

## Trun

Vischnanca politica, circul Mustér, district Surselva (fin il 2001 Rain Anteriur), cun ils aclauns e bains da Cumadè, Bardigliun, Campliun, Gravas, Caltgardira, Cartatscha, Flutginas, Darvella, Lumneins e la fracziun da Zignau. Dapi il 2012 appartegna er Schlans a la vischnanca politica da Trun. La vischnanca è periclitada dapi tuts temps da lavinas (Munt, Cavistrau), da bovas e dad auas grondas (Zavràgia, Zinzera, Rain). 765 *Tauronto*, tudestg Truns (fin il 1943). 1850 1047 abitants; 1900 974, 1950 1598, 2000 1322. A Caltgeras al nord da la via da Trun a Darvella han ins scuvert ina colonia dal temp da bronz (ca. 1200 a.C.), a Darvella ina necropola dal temp preistoric ed a Grepault ina colonia dal temp da Hallstatt (a partir da 400 a.C.). Il mir da defensiun dal temp medieval tempriv ed ina baselgia cun sala dal 6avel/7avel tschientaner dattan perdita d'ina colonisaziun permanenta a Trun. La foppa da Trun è vegnida colonisada a fin il pli tard en il temp medieval tempriv. L'on 765 ha l'uvestg Tello regalà a la claustra da Mustér trais colons a Trun ch'appartegnevan a la curt da Schlans. A partir dal temp medieval ha Trun furmà, sco vischinadi dal cumin da la Cadi, cun Sumvitg la quarta curt. Chastels claustrals (Cartatscha sur Trun da ca. 1100, Farberg a la via da Schlans da ca. 1248, Ringgenberg menziunà il 1283 e Phiesel, oz en muschna) marcavan il cunfin da la Cadi a Trun vers ils signuradis da Vuorz/Munt S. Gieri. L'on 765 è menziunà in Presbyter Sylvanus a Trun, il 1272 il patrocini da s. Martin che renviescha al temp francon. La collatura ha gì fin il 1631 la claustra da Mustér. Ina baselgia filiala sa chattava a Zignau. Il 1663–64 è vegnida erigida ad Acladira la baselgia da pelegrinadi consecrada a Nossadonna da la Glisch (benefiziat, anc oz impurtanta). A Trun è vegnida fundada 1424 la Lia Sura/Lia Grischa, e fin il 1798 è Trun stà il lieu da dretgira, fin il 1814 il lieu da dieta da la Lia Grischa. A si'impurtanza sco lieu central regordan l'ischi, simbol da la libertad conquistada, sut il qual la Charta da la Lia Grischa dal 1424 è vegnida engirada e renovada periodicamain fin il 1778, la chaplutta da S. Onna (amplifigada il 1701 cun in portic cun maletgs commemorativs) e la Cuort Ligia Grischa, antieriura curt claustrala, en la quala vegnivan salvadas las dietas da la Lia Grischa (oz en possess da la Fundaziun Cuort Ligia Grischa ch'ha installà qua in museum). Il 1739 ha Trun cumprà ora la dieschma claustrala. Dal 16avel tschientaner fin enturn il 1850 han ils da Trun explotà argent sin l'Alp

Nadels sco era minerals da fier e d'arom sin l'Alp Punteglias. Durant la Helvetica è Trun stà il lieu principal dal district da las Funtaunas dal Rain e la sedia da la prefectura dal chantun Rezia. Il 1815 è Trun daventà la sedia da la dretgira districtuala dal Rain Anteriur. Fin il 1912 ha existì a Trun in'impurtanta staziun da la posta a chavals. A Trun sa chattava era la pli veglia e pli gronda interpresa industriale da la Surselva: ina filandaria da launa da nursas (1863) ed ina tessaria (serrada il 1868). A quella è suandada il 1875 ina fabrica da palpieri ed il 1911 la Fabrica da ponn Trun SA (falliment 2001). Quest'industria e l'access a la Viefier retica (1912) han effectuà in stausch innovativ e chaschunà in augment da la populaziun. La lavur da fabrica e la masterganza da construcziun han piglià suramaun, entant ch'il dumber dals manaschis agriculs è sa diminui cuntinuantamain. Dapi il 19avel tschientaner dispona Trun d'in modest turissem da cultura, e dapi ils onns 1960 profita la vischnanca dals centers turistics vischins da la Surselva. Sper la chaplutta da S. Onna sa chatta il Curtin d'onur, installà per persunas meritaivlas da l'intschess da l'antieriura Lia Grischa. Il 1966 è vegnida remplazzada la chasa da paupers dal 1889 tras ina chasa d'attempads, il 1977 è vegnida erigida la Casa Depuoz, ina dimora per persunas cun impediments. Part da la populaziun da lingua rumantscha: 2000 79,1% / 87,8% (megra lingua / tuttas indicaziuns). Adolf Collenberg

## Curtin d'onur da la Lia Grischa

Fundà il 1924 a chaschun da la festa commemorativa per il 500avel anniversari da la Lia Grischa ed installà a Trun tranter la chaplutta da S. Onna e l'ischi. Quest panteon rumantsch, purtà da la fundaziun Cuort Ligia Grischa, è vegnì tgirà fin il 1968 da la Romania, dal 1969–2006 ensemen cun la Renania. Cun ina tavla commemorativa vegnan undradas personalitads da l'intschess da la Lia Grischa ch'han acquistà meritis singulars e stgaffi ovras d'impurtanza en favur da la lingua e cultura rumantscha. En ils onns 1924, 1971, 1984 e 2002 èn vegnids undrads tut en tut 29 umens ed ina dunna (Anna Capadrutt).

Adolf Collenberg



Chaplutta da S. Onna a Trun; davosvart a dretga la ruina da Cartatscha. (Maletg da Johann Rudolf Bühlmann, 1876).

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.